

DETEKTIVEN?

Laang hu Wëssenschaftler geduecht, datt Vulle ganz schlecht ruche kënnen. Ganz vill Experimententer hunn awer de Géigendeel bewisen. Muench Vullen (ë. a. Kiwi, Routkappgeier, Stuermvullen) verlosse sech esouguer haaptsächlech op hire Geruchsënn, wa si eppes fir ze friesse sichen. Déi verschidde Gerécher ginn an der Nues opgeholl an un d' Richkolbe weidergeleet. Vullen, déi ganz gutt ruchen, hunn dowéinst och grouss Richkolben.

Wéi gouf de Geruchsënn beim Kiwi nogewisen? De Kiwie goufen zwee Eemere mat Buedem virgesat. A just engem Eemer ware Wierm, déi mat fiichtem Buedem bedeckt waren. Dowéinst konnten d'Kiwie se net gesinn. Trotzdeem hunn d'Kiwie mat hirem Schniewel just an den Eemere mat de Wierm gewullt.

Well an der Spëtzt vum Kiwi sengem Schniewel ganz vill Nerve sinn, spillt den Taaschtsënn och eng Roll, wa si eppes fir ze friesse sichen.

Kiwie sinn an der Nuecht aktiv an hunn dowéinst just ganz kleng Aen. Viru kuerzem gouf an Neuseeland esouguer nogewisen, datt blann Kiwien ouni Problemer an der Natur iwverliewe kënnen.

Stuermschwuwelen bréien an Hielen am Buedem oder a klengen Hielen a Fielsen. Wéi Experimententer gewisen hunn, fannen dës nuetsaktiv Vullen hir Bréiplaze just duerch hire Geruchsënn. Welleleefer (*Hydrobates leucorhous*), bei deenen de Geruchsnerf duerchgeschnidde gouf, fléien net méi bei hir Bréihielen zeréck.

Aner Experimententer hu gewisen, datt Stuermvulle Krill esouguer iwver eng Distanz vu bis zu 25 km ruche kënnen. Gëtt de Plankton vu Kriibsen giess, dann entstinn Schwiewelverbindung, déi vun de Stuermvulle festgestallt ginn.